

13/10/1998

Negara jiran mula faham isu Anwar

KUALA LUMPUR, Isnin - Kerajaan negara jiran semakin jelas dengan kedudukan sebenar isu pemecatan Datuk Seri Anwar Ibrahim berikutan penjelasan perwakilan Malaysia di sana.

Tindakan bekas ahli Umno, Dr Abdul Rahim Ghouse, Saifudin Nasution dan Mohamad Ezam Mohd Nor yang memburuk-burukkan kepemimpinan Perdana Menteri dan kerajaan di negara jiran juga ditangkis oleh kedutaan Malaysia.

Duta Malaysia di Bangkok, Datuk Syed Ariff Fadzillah Syed Awaluddin, berkata pihaknya sudah menemui Perdana Menteri Thailand, Chuan Leekpai, menteri-menteri Kabinet dan pemimpin pertubuhan Islam di negara itu untuk menerangkan kedudukan sebenar.

Menurutnya, kegiatan Saifudin yang cuba memburuk-burukkan Datuk Seri Dr Mahathir Mohamad dan kerajaan tidak lagi membimbangkan kerana kedutaan sudah menjalankan tindakan yang perlu.

"Kerajaan Thailand juga memberi jaminan akan bertindak sewajarnya jika Saifuddin menimbulkan masalah kepada negara jiran dan menjejaskan masyarakat Thai.

"Kami juga sudah berjumpa dengan golongan berpengaruh terutama di kalangan masyarakat Islam Thai untuk memberi penerangan dan mereka menerimanya dengan baik," katanya ketika dihubungi hari ini.

Saifudin, Mohamad Ezam dan Dr Abdul Rahim dilaporkan cuba memburuk-burukkan Malaysia berdasarkan kenyataan akhbar yang difakskan kepada akhbar tempatan dan disebarakan menerusi Internet.

Dalam kenyataan mereka, ketiga-tiga bekas pemimpin Pemuda Umno itu menghentam kerajaan dan kepemimpinan Dr Mahathir dengan menggunakan bahasa tidak sopan.

Saifuddin dipercayai menemui pemimpin pertubuhan Islam di Thailand untuk mendapatkan perhatian dan sokongan.

Beliau dipercayai berpindah-randah dari satu tempat ke satu tempat bagi mengelak dikesan.

Syed Ariff berkata, masyarakat Thai sedar kerajaan Malaysia tidaklah seburuk seperti digembar-gemburkan pihak tertentu.

"Rakyat Thailand tidak mudah dipengaruhi dan mereka tahu kerajaan kita tidak mengamalkan pemerintahan kuku besi atau diktator seperti didakwa Saifudin," katanya.

Kedutaan Malaysia di Manila pula memberi penerangan kepada pemimpin kerajaan, masyarakat Islam, pertubuhan bukan kerajaan (NGO) dan usahawan di Filipina mengenai isu Anwar.

Dutanya, Datuk Abdul Aziz Mohamad, berkata sejak kebelakangan ini media tempatan tidak lagi terlalu rancak menyiarkan berita mengenai isu Anwar berbanding dua minggu lalu.

"Rancangan pihak tertentu untuk mengadakan demonstrasi di hadapan kedutaan kita minggu lalu juga tidak jadi. Ini menunjukkan masyarakat Filipina mula faham dan menghormati keputusan kerajaan menyerahkan isu Anwar kepada mahkamah," katanya.

Menurutnya, beliau sering dikunjungi pemimpin Islam, NGO dan golongan usahawan Filipina yang ingin mengetahui kedudukan sebenar isu Anwar berbanding apa yang diceritakan oleh media tempatan dan Dr Abdul Rahim.

Di Jakarta, Duta Malaysia, Datuk Zainal Abidin Alias berkata kedutaan itu mendapatkan kerjasama pihak berkuasa Indonesia untuk mengesan dan mengawasi pergerakan Dr Abdul Rahim yang dikatakan berada di negara itu sejak seminggu lalu.

"Kami sudah memaklumkan pihak berkuasa Indonesia mengenai kehadiran Dr Abdul Rahim Ghouse dan meminta mereka memaklumkan kedutaan," katanya.

Menurutnya, kedutaan mengetahui kedatangan Dr Abdul Rahim ke Jakarta apabila beliau muncul dalam rancangan televisyen swasta.

"Kami juga sedang mendapatkan maklumat mengenai kemunculan Dr Abdul Rahim di televisyen itu serta mengawasi perkembangannya di Jakarta," katanya.

(END)